

সূরা - ৮২

বিদীর্ণ করা

(আল্-ইনফিত্বার, :১)

মক্কায় অবতীর্ণ

আল্লাহ্‌র নাম নিয়ে, যিনি রহমান, রহীম।

- ১ যখন আকাশ বিদীর্ণ হবে,
- ২ আর যখন নক্ষত্রসব বিক্ষিপ্ত হবে,
- ৩ আর যখন সমুদ্রগুলো উচ্ছলিত হবে,
- ৪ আর যখন কবরগুলো উন্মোচিত হবে,—
- ৫ তখন প্রত্যেকেই জানতে পারবে সে কী আগ-বাড়িয়েছে, আর কী সে পেছনে ফেলে রেখেছে।
- ৬ ওহে মানব! কিসে তোমাকে ভুলিয়েছে তোমার মহানুভব প্রভুসম্বন্ধে—
- ৭ যিনি তোমাকে সৃষ্টি করেছেন, তারপর তোমাকে সুঠাম করেছেন, তারপর তোমাকে সুসমঞ্জস করেছেন,—
- ৮ যে আকৃতিতে তিনি চেয়েছেন সেইভাবে তিনি তোমাকে গঠন করেছেন?
- ৯ না, তোমরা বরং সদিচারকেই মিথ্যারোপ করছ।
- ১০ অথচ তোমাদের উপরে নিশ্চয়ই তত্ত্বাবধায়করা রয়েছে,—
- ১১ সম্মানিত লিপিকারগণ,
- ১২ তারা জানে তোমরা যা-কিছু কর।
- ১৩ ধার্মিকরা নিশ্চয় থাকবে আনন্দেরই মাঝে,
- ১৪ আর পাপাচারীরা আলবৎ থাকবে ভয়ংকর আগুনে,—
- ১৫ তারা এতে প্রবেশ করবে বিচারের দিনে
- ১৬ আর তারা এর থেকে গরহাজির থাকতে পারবে না।
- ১৭ আর কিসে তোমাকে বুঝতে দেবে কী সেই বিচারের দিন?
- ১৮ পুনরায় কিসে তোমাকে বোঝানো যাবে বিচারের দিন কি?
- ১৯ এ সেইদিন যেদিন কোনো সত্ত্বা কোনো আত্মার জন্যে কোনো-কিছু করার সামর্থ্য রাখবে না। আর কর্তৃত্ব সেইদিন হবে আল্লাহ্‌রই।